

Արժանապատիւ Տ. Աբէլ աբեղայի Աբրահամ-  
եան և պարոնայց Մանուկայ Աբեղեան, Գէորգայ  
Ալթունեան, Ռուբենի Աբրահամեան և Գուրգենայ  
Էդիլեան—անդամոց նորակազմ խմբագրութեան  
«Արարատ» ամսագրի Մայր Աթոռոյս,

Առաջադրութեամբ մերով ի 19 դեկտեմբ. անցելոյ  
կարգեալ էաք զՏ. Աբէլ աբեղայն խմբագիր «Արարատ»  
ամսագրի. բայց զարդիս ցանկալով զամսագիրն դարձու-  
ցանել արժանաւոր հրատարակութիւն ըստ վեհ նշանակու-  
թեան Մայր Աթոռոյս ճօխ և շահեկան բովանդակութեամբ՝  
բարւոք վարկաք կազմել խմբագրութիւն:

Ըստ այսմ, յետ խորհրդակցութեան ընդ Տեարս ան-  
դամս Սինոդի և ընդ յարգութիւնս Ձեր կազմեմբ զցան-  
կացեալն մեր խմբագրութիւն կոչելով զՁեզ անդամս  
խմբագրութեան այնու, զի խմբագրական ամբողջ կազմն  
պատասխանատու լիցի առաջի բարձր իշխանութեան Մայր  
Աթոռոյս, և զյարաբերութիւնս ունի վարել ի ձեռն նա-  
խագահի իւրոյ, զոր խմբագրութիւնդ ընտրելոց է ի միջոյ  
իւրմէ, իսկ Տ. Աբէլ աբեղայն մնալով անդամ խմբագրու-  
թեան՝ միայն խմբագիր կոչմամբ ներկայացուցիչ լինելոց է  
առաջի քաղաքական իշխանութեան:

Պատուիրեմբ խմբագրութեանդ զգուշաւորութեամբ  
հրատարակել «Արարատ», որպէս զպաշտօնական ամսագիր  
Մայր Աթոռոյ, այլ և ջանալ զամսատետրս ի լոյս ընծայել  
յամիս ըստ ամսոյ անխափան զիւրաքանչիւր տպագրական  
թերթ յետ կապելոյ յէջս, մատուցանել մեզ ի տես և ի  
թոյլաւութիւն, որպէս պատուիրեալ էաք Տ. Աբէլ աբեղայի  
ի կարգելն զնա խմբագիր...

Ազօթելով առ Աստուած ուղիղ առնել զգործս ձեռաց  
Ձերոց և յաջողիլ՝ մնամբ ազօթարար

Տեղակալ Գէորգ Արեւիկիսկոպոս.

Թ. 2257

13 յունուարի 1912 ամի

Ս. Եջմիածին